



27. januar 2011

Inatsisartut suleriaasianni § 37 naapertorlugu matumuuna imaattumik apeqqummik nassiussivunga.

1. Timmisartumik angallavinni imminut akilersinnaanngitsuni Air Greenlandip angallassisarnermini ukiumut aningaasartuutigisartagai kiffartuussinissamik isumaqatigiissut aqutigalugu tamakkiisumik imaluunniit ilaannakortumik matussuserneqartarpat?

(Inatsisartuni ilaasorta, Malik Berthelsen, Siumut)

Tunnngavilersuut:

17. maj 2010 tassunga assingusumik apeqquteqareernikuuvunga. Tassani Nalakkersuisunit akissutigineqarpoq kiffartuussinermut aningaasaliissutit 102,5mio.kr. illoqarfinni sorlerni angallassisinnaanissanut matussutissatut atorineqartarnersut.

Massakkut paaserusutara tassaavoq illoqarfinni taakkunani pineqartuni angallassisoqartillugu aningaasartuutaasartut tamakkerlutik imaluunniit ilaannakortumik Nunatta karsianiit akilerneqartarnersut?

Paaserusuininnut pissutaavoq siusinnerusukkut nassuiaatigereernikuusara, tassa Air Greenland unammillerneqaralutuinnarni pissutigalugu oqaatigisarmagu sumiiffiit imminut akilersinnaanngitsuni bilitsit akii qaffanneqartariaqartut imaluunniit illoqarfiit taakkua allatut ajornartumik tikinneqartarnerat akuttunerulersinneqartariaqartut aningaasartuutikillisaaneq pissutigalugu.

Sumiiffinni imminut akilersinnaanngitsuni aningaasartuutit tamakkerlugit Nunatta karsianiit matussuserneqartarsimappata utoqqatsissut taanna atorsinnaanngitsutut isumaqarpunga kisiannili aningaasartuutit ilaannai matussuserneqartarsimappata soorunami utoqqatsissut atussallugu pissusissamisuusaaq.